

# Galatia

## Galatia Ekalesia veize Paulo'a Mirihirote'e So'āga

### Ihore Ğoe'a

So'a 'ahi'e Paulo'a Galatia haba'ano ekalesia veize mirihiro. Paulo'e ibite zeğe habao mada nu radiunu. Iuda ekalesia azağā nu'a Iesu mazao fie'ena'a, Mose goro ġoe'a zuni hegotiro. Ze 'ouge hağadu Badi'a ubumao duduğā re'uma rae ziro. Ze'a Iuda mene azağā zuni Iesu mazao fie'ena'a, Mose goro ġoe'a hegotine Badi'a ubumao duduğā re'uma rae ihoziro. Paulo'a so'a 'ahi zamağano zeğe ġoere'e ve'oğā rae fureniro. Mene Mose goro ġoe'a hegote'ete'e u'ano, rehano Iesu mazao fie'ete'e u'ano da'o Badi'a ubumaoeme'e duduğā re'uma rae ihoziro.

<sup>1</sup> Eğe, Paulo'e vaze'a te'ote'ohadu apostolo vazegano mene reiro, zu vaze 'ahogani'a ohohadu apostolo vazegano mene reiro. Rehano Iesu Keriso ebu rune azağā bo'āgano ani bare ġabonirote'e Badi'āga, emeğe Mama'a ohohadu apostolo vazegano reiro.

<sup>2</sup> Eğe'a eğe teite radiu'ete'e ekalesiağā nego nabudi nidu'a teite Galatia haba'ano ekalesia 'ahoga'ahoga veize so'a 'adi mirihe'ohe.

<sup>3</sup> Badi'a emeğe Mama zu Zuhı'a Boro Iesu Keriso'a zae mazao manoğā zu zama roğeğā zini'eno'i.

<sup>4</sup> Izidi madığa sau'anono'o eme bohafe bufoga veize, Iesu Keriso'a Badi'a emeğe Mama ura

idunağano emeğe hağai sau'a rae modifine ane bare dibu'iro.

<sup>5</sup> Badi'a ni mae ġihinihi, onamo radiu tuğutuğu. Amen.

### *Keriso Hari Manoğa'e Tiba Da'o*

<sup>6</sup> Keriso'a furenirote'e manoğağa zamağano zae'a radoga veize Badi'a'a zae huziro. Rehano za Badi'a ġarihe fase modadu hari manoğa 'ahoga mae ġihine'e 'ahine, e zaguzagau'ohe.

<sup>7</sup> Hube hune hari manoğa 'ahoga'e o'o'a, rehano vaze nu'a za mae 'ada'adaze'ohe zu Keriso hari manoğa ġihunihi ra'ohe.

<sup>8</sup> Rehano emeğe ga adureono'o tuğure vigani'a zuni ibite eme'a zae mazao haramirote'e hariğā manoğa mene haramadu hari manoğa 'ahoga zae mazao haramine, Badi'a mazaono'o radiu tuğutuğu adugağa hidi'uma!

<sup>9</sup> Eme'a ibite zirote'e teige, e izidi bare zi'ohe. Iniu'a eğe mazaono'o igirote'e hariğā manoğa zae mazao mene haramadu hari manoğa nunu zae mazao haramine, ani'e radiu tuğutuğu adugağa hidi'uma!

<sup>10</sup> E vaze'a eğe ġoere'e duduğā rae mae ġihinifine izidi inare'ehe? Ga Badi'a'a eğe ġoere'e duduğā rae mae ġihinifine inare'ehe? Eğe'a vaze matu'ozoga veize inare'ehe? E'a izidi zuni vaze matu'ozoga veize inarifone, e'e Keriso mene tuğure vazeğā reifo.

### *Paulo'e Badi'a'a Apostolo Vazeğano Ohoniro*

<sup>11</sup> Nego nabudi, eğe'a haramirote'e hariğā manoğa'e vazeono'o mene arirota'a'e za'a ederoga e urate'ohe.

**12** Hari manoġa a'e vazeni 'ahogani'a mene iniro zu mene iohiro. Rehano Iesu Keriso'a hari manoġa e'e eġe mazao rae furenadu eġe'a meiro.

**13** Za'e ibite eġe'a Iuda azaġa kuru ibiġa hegottirote'e madaġano haġairote'e haġaiġa igiro. Eġe'a Badi'a mone ekalesia azaġa aduga boro ziniro zu ruizihi reiro.

**14** E'a Iuda azaġa kuru ibiġano e'e goroġa ġoe'a inare hegottiro. E'e moneo e Iuda azaġa bo'aġano eġe teite muri tiba azaġa ġehaġa ufeta vitiziro. Ebu eġe vouġa haġai hegote hunihi rae ufeta inariro.

**15** Rehano e 'izema fureranogano, Badi'a'a e avo ohohiro zu ani'a eġe mazao manoġa furenadu eġe huhiro.

**16** Eġe'a Iuda mene azaġa mazao Ubuga hari manoġa haramifine, ani'a matu'e'ena'a, eġe mazao Ubuga mae fureniro. E'e madaġano e vaze vaġe mene onamadu zeġe teite mene ġo'aniro.

**17** Ebu eġe ibite vitihe apostolo azaġano reirote'e azaġa teite ġoerihi radu Ierusalema mene itiro. Rehano Arabia haba'a onamadu e'ea radiunu, ebu vesu'u Damaseko bariro.

**18** Ebu Iesu'a eġe mazao furerarote'e madaġanono'o muri uġidu enogano, e Petero\* ġianoga rae Ierusalema itiro ebu ane teite mada 15 radiro.

**19** E'e madaġano apostolo vazeġa 'ahoga mene horoniro, rehano Zuhi'a Boro negoġa Iakobo da'o horoniro.

**20** Eġe'a zae veize 'adi mirihe'eta'a'e Badi'a ubumao hube hune mene ġuriro ġoe'a.

\* **1:18 1:18 Kefa**

<sup>21</sup> Ebu e Ierusalem mode iğunadu Siria zu Kilikia haba'a onamiro.

<sup>22</sup> E'ano'o Iudea haba'ano Keriso mone eklesia azağ'a'e e mene ederiro.

<sup>23</sup> Ze'e harihe da'o 'ahige iginu, "Ibite aduga rifidote'e vazegani'a eme'a fie'ete'e mae vağinihi rae inariro. Rehano izidi'e ani Keriso mazao fie'ete'e moneo harame'ohe."

<sup>24</sup> Ze nagini'a eğe mazao furerarote'e egadu Badi'a niguniro.

## 2

### *Apostolo Azağani'a Paulo mae Ğihiniro*

<sup>1</sup> Muri 14 enogano e Banabasi teite Tito zamahanadu Ierusalem bare itiro.

<sup>2</sup> Badi'a'a, "Ito'i," rae ehadu e'a itiro. Itadu e Iuda mene azağ'a mazao hari manoğa harame'ete'e moneo eklesia azağ'a me'odoziniro. Eklesia azağ'a ibitozi'ete'e azağ'a teite'e avo nu'oranadu me'odoziniro. Mazağ'a ibite eğe'a gaue arirota'a'e zu izidi gaue'eta'a'e huga o'o'ano rouga e mene uratiro.

<sup>3</sup> Tito zuni eğe teite e'ea radiro. Ani'e Giriki vazega rehano, eklesia ibitozi'ete'e azağani'a ani ahi'a rana iğuri hağaoğa mene te'ote'oniro.

<sup>4</sup> Mazağ'a ġuriro eklesia azağ'a nu'a emeğe eklesia zamağano sifu diuġi ariro. Ebu ze emeğe'a Keriso Iesu teite tiburanadu Mose goro ġoe'anono'o bohafe bufirote'e rihinoga uratiro, ebu emeğe tutufadu Mose goro ġoe'a hegote'ete'e tuğure azağano rouga uratiro.

**5** Rehano zae'a hari manoḡa moneo ġoere huga īgaiḡa obone giganoga veize, eme zeġe ġoere tahiga zu mene mae ġihiniro.

**6** Ekalesia ibitozi'ete'e azaġa'e nize boro reħano, e ze mene zamare'ohe, mazaġa Badi'a'a vaze enone da'o ġianadu ze'e manoġa ga sau'a rae mene ra'ohe. Ze'a e Iuda mene azaġa mazao harame'ete'e hariġa manoġa moneo ġoereni 'ahoga mene iħiro.

**7** U ze'e Badi'a'a Iuda azaġa\* mazao hari manoġa harame'ete'e gauġa Petero harote'e teige, Iuda mene azaġa† mazao harame'ete'e gauġa eġe inirota'a'e ederiro.

**8** Badi'a'a ane inaraġa Petero hanadu Iuda azaġa veize apostolo gauġa harote'e teige, Badi'a'a inaraġa eġe enadu Iuda mene azaġa veize apostolo gauġa iniro.

**9** Iakobo, Petero zu Ioane'e ekalesia bo'āġano ne gadoġa heuġa. Ze Badi'a'a eġe mazao manoġa furenirote'e ederiro tene, eġe zu Banabasi teite unihifine obotitiro. Ebu eme'e Iuda mene azaġa vaġe onami'uma, u ze'e Iuda azaġa vaġe onami'uma rae ġoere idaniro.

**10** Ze eme'a zahara azaġa zamaradu danazoga veize da'o umifiro. A'e eġe'a zuni hube hune haġġae inare ariote'e gauġa.

### *Paulo'a Petero Roniro*

**11** Rehano Petero'a Antioka arirotene, ani'a ve'oġa haġġadu eġe'a ani ubuma 'ue roniro.

\* **2:7 2:7 ahiri rana iġuri haġġairote'e azaġa      † 2:7 2:7 ahiri rana iġuri mene haġġairote'e azaġa**

<sup>12</sup> Ani'e Iakobo mazaono'o Iuda azaḡa nu'a 'izema arogano Iuda mene azaḡa ekalesiaḡa teite tiburu ogaudio. Rehano ze'a feurirotene, ani'e Iuda mene azaḡa mazaono'o 'ie baradu zeḡe teite mene ogau tiburaro, mazaḡa ani'e Iuda azaḡa‡ rihoziro.

<sup>13</sup> Ani'a 'ougirotene, e'ea radiunute'e Iuda azaḡa zuni ani hegopotadu zama guhi azaḡa teige ve'oriro. Ebu Banabasi zuni zeḡe teite ve'oriro.

<sup>14</sup> E zeḡe'a hari manoḡa huga mene ibi duduḡano hegopotinute'e horonirotene, zeḡe nidu'a ubumao Petero niro, "Ga'e Iuda vazegā rehano, Iuda azaḡa goro ḡoe'a mene hegote'ena'a, Iuda mene azaḡa teige radiu'ohe. U ḡa'e nougadu Iuda mene azaḡa'e Iuda azaḡa teige rado'i rae ra'ohe?"

*Fie'ete'e u'ano Badi'a ubumao Duduḡa rae Ra'ohe*

<sup>15</sup> Eme'e furerarote'e madaḡanono'o Iuda azaḡa. Ebu Iuda mene azaḡa'e haḡai sau'a azaḡa rae huze'ohe, u eme'e ze mene heuḡa ra'ohe.

<sup>16</sup> Rehano eme edeḡa, Mose goro ḡoe'a hegopotadu Badi'a ubumao duduḡa rae mene ra'ohe, rehano Iesu Keriso mazao fiadu Badi'a ubumao duduḡa rae ra'ohe. E'ano'o emeḡe zuni Keriso Iesu mazao firo. A'e, mene eme'a Mose goro ḡoe'a hegote'ete'e u'ano, rehano Keriso mazao fie'ete'e u'ano, Badi'a ubumao duduḡa rae reifine reiro. Mazagā iniu Mose goro ḡoe'a hegote'ete'e u'ano, Badi'a ubumao duduḡa rae ra'ete'e vazegā'e o'o'a.

---

‡ **2:12 2:12 ahiri rana iğuri haḡairote'e azaḡa**

<sup>17</sup> Eme'a Keriso mazao fiadu Badi'a ubumao duduğā rae rouga veize inare'ena'a, emeğe zuni hağai sau'a azağā rae ra'ete'e furenine, Keriso'e emeğe'a hağai sau'a hağāoga veize tutufe ve'ofe'ete'e vazēga ra'ehe? Mene hune!

<sup>18</sup> E Mose goro ġoe'a modiro. Eğe'a e'e bare meine, e eğe'a bare goro ġoe'a varade'ete'e vazēga rae re'uma.

<sup>19</sup> E Mose goro ġoe'a u'ano rudanadu e'e veize mene bare radiu'ohe. A'e Badi'a veize radifine ra'ohe.

<sup>20</sup> E Keriso teite satauro rana rudaro. E'ano'o e eğe'a bare mene radiu'ohe, rehano eğe zamao'e Keriso'a radiu'ohe. E ahiri hina raha 'adao radiu'eta'a'e, eğe zamare borofadu eğe veize ġaboneğā ahetirote'e Badi'ağā Ubuga mazao fie'ete'e u'ano, radiu'ohe.

<sup>21</sup> E'e Badi'a'a eğe mazao furenirote'e manoğāga mene hezahohau'ohe, mazağā Mose goro ġoe'a hegotlandu Badi'a ubumao duduğā rae reifone, Keriso'e foure rudaro rae reifo.

### 3

#### *Iesu mazao Fie'ete'e u'ano Duduğā rae Ra'ohe*

<sup>1</sup> Galatia ekalesia azağā, za'e kaurığa! Iesu Keriso'a zae veize satauro rana rудароте'e eğe'a doğō'ani ihozadu zae'a ubumazeo horonirote'e heuğā rehano, zamaze'e iniu'a aro?

<sup>2</sup> E ġau tiba da'o zae mazaono'o ederihi ra'ohe. Zae'a Vine Zağogā meirota'a'e Mose goro ġoe'a hegotirote'e u'ano ga emeğe'a haramirote'e hariğā manoğā egadu e'e mae ġihinirote'e u'ano?

**3** Za ufeta kaurīgahe? Za'e Vine Zaḡogani'a ibitozeadu Iesu mazao fie'ete'e ḡadaheniro, re-hano izidi za'e vaze inaraḡa hina haug̫hi ra'ehe?

**4** Ibite zae'a aduga ḡehaḡa hidirota'a'e huga o'o'ahe? A'e hube hune hugeta!

**5** Nagini u'ano Badi'a'a za Vine Zaḡogā zini'ohe zu zae bo'aḡano haḡai gigi'aḡa haḡae'ohe? Zae'a Mose goro ḡoe'a hegote'ete'e u'ano ga zae'a hari manoḡa egadu e'e mae ḡihine'ete'e u'ano?

**6** Buka Zaḡogano 'ahige rae mirihiro, "Aberahamo'a Badi'a mazao fiadu Badi'a'a ani'e duduḡa rae mae ḡihiniro."<sup>⊗</sup>

**7** E'ano'o fie'ete'e azaḡa'e Aberahamo mariga rae edero'i.

**8** Iuda mene azaḡa'e fie'ete'e u'ano, Badi'a ubumao duduḡa re'uma rae ra'ete'e Buka Zaḡogano irina ihoziro. Ebu Buka Zaḡogānō'o Badi'a'a e'e hariḡa manoḡa irina Aberahamo niro, "Haba nidu'a zamaḡano radiu'ete'e azaḡa nidu'a'e ḡae mazaono'o manohuga hidi'uma."<sup>⊗</sup>

**9** Aberahamo'e firote'e vazega 'ahine, ani teite fie'ete'e azaḡa zuni manohuga hide'ohe.

**10** Mose goro ḡoe'a hegotedu Badi'a ubumao duduḡa re'uma rae ra'ete'e azaḡa nidu'a aduga tuḡutuḡu hidi'uma. Mazāga Buka Zaḡogano 'ahige rae mirihiro, "Iniu Mose goro ḡoe'a bukaḡa zamaḡano mirihirote'e goroḡa nidu'a iḡaiḡa mene hegote'ete'e azaḡa nidu'a radiu tuḡutuḡu adugaḡa hidi'uma."<sup>⊗</sup>

**11** Hube hune iniu'a Mose goro ḡoe'a hegotedu Badi'a ubumao duduḡa rae ra'ete'e vazega'e

<sup>⊗</sup> **3:6 3:6** Ġadaheḡa 15:6    <sup>⊗</sup> **3:8 3:8** Ġadaheḡa 12:3, 18:18, 22:18

<sup>⊗</sup> **3:10 3:10** Goro 27:26

o'o'a. Mazaǵa Buka Zaǵoǵano 'ahige rae mirihiro, "Badi'a ubumao duduǵa azaǵa'e ze'a fie'ete'e u'ano, radi'uma."<sup>☆</sup>

<sup>12</sup> Mose goro ǵoe'a'e fie'ete'eano'o mene fureraro. Buka Zaǵoǵano'e 'ahige rae mirihiro, "Mose goro ǵoe'a nidu'a hegote'ete'e vazeǵani'a 'ouge haǵadu ǵabode radi'uma."<sup>☆</sup>

<sup>13</sup> Mose goro ǵoe'a'e emeǵe rana radiu tuǵutuǵu adugaǵa ti'ohe. Rehano emeǵe rana tirote'e radiu tuǵutuǵu adugaǵa a'e Keriso'a ane rana teadu radiu tuǵutuǵu adugaǵanono'o eme bohafe bufiro. Buka Zaǵoǵano 'ahige rae mirihiro, "Ire rana midau tirote'e azaǵa nidu'a'e radiu tuǵutuǵu adugaǵa hidirote'e azaǵa."<sup>☆</sup>

<sup>14</sup> Keriso'a 'ouge haǵairota'a'e, Badi'a'a Aberahamo harote'e manohugaǵa Keriso Iesu u'ano Iuda mene azaǵa zuni zinifine, ebu eme'a fie'ete'e u'ano, Badi'a'a rifi'uma rae ǵoitorirote'e Vineǵa Zaǵoǵa emeǵe'a meifine ra'ohe.

### *Mose Goro ǵoe'a zu ǵoitorore ǵoe'a*

<sup>15</sup> Nego nabudi, emeǵe radone zamáǵano hari idaidaǵa 'ahoga zi'uma. Vaze aheu'a ǵoere idanadu ǵoitorine, vaze 'ahogani'a hena mene fahi'uma ga ǵoere 'ahoga mene bare ragate ti'uma.

<sup>16</sup> Badi'a'a Aberahamo zu ane mariga 'ahoga teite ǵoitoriro. Buka Zaǵoǵano, "Vaze ǵehaǵa," rae ihozifine, "Marigo duǵuru teite ǵoitoriro," rae mene reiro, rehano "Vaze tiba da'o," rae ihozifine, "Marigo 'ahoga teite ǵoitoriro," rae reiro. A'e Keriso.

---

<sup>☆</sup> 3:11 3:11 Habaku 2:4    <sup>☆</sup> 3:12 3:12 Dibu'o 18:5    <sup>☆</sup> 3:13 3:13  
Goro 21:23

**17** Ege'a reihi ra'ete'e huga'e 'ahi e'e: Badi'a'a ibite Aberahamo teite goitoriro. Ebu muri 430 enogano Moseono'o goro goe'a rifiro. E'ano'o Mose goro goe'ani'a Badi'a goitore goe'a fahadu huga o'o'a rae rouga'e mene idaغا.

**18** Eme'a Mose goro goe'a hegote'ete'e u'ano, Badi'a emege Mama'a rifi'ete'e toheغا meine, a'e mene Badi'a'a Aberahamo teite goitorirote'e goe'a u'ano ma'ete'e toheغا. Badi'a'a Aberahamo teite goitorirote'e u'ano, Moga Badi'a'a hau'ete'e toheغا Aberahamo haro.

**19** Tena Mose goro goe'a'e nagini veize? A'e vaze'a hağai sau'a hağaine, ze'e ve'oğa hağaeħa rae iħozifine ragate mirihirote'e goroğa. Mose goro goe'ani'a 'ouge gauinu, onamo Aberahamo mariga 'ahoga, Badi'a'a goitorirote'e vazegani'a ariro. Mose goro goe'a'e Badi'a'a ane tuğure vigaono'o nema vazegä Mose hanadu hağairo.

**20** Vaze nu'a goitore'etene, nema vazegä urate'ohe. U Badi'a'a Aberahamo teite goitoriotene, Badi'a tibuhuga da'o hağairo.

### *Mose Goro Go'e'a'e Nagini Veize?*

**21** 'Ougadu Mose goro goe'a'e Badi'a'a goitorirote'e goe'a hezaohau'ehe? Mene hune! Badi'a'a ġabone rifi'ete'e goroğa goe'a rififone, eme'e goro goe'a e'e hegötadu Badi'a ubumao duduğa rae reifo.

**22** Rehano Buka Zaġoġani'a ġau nidu'a'e hağai sau'a inaraġa hegote'ete'e ġu'a azaġa teige radju'ohe rae ra'ohe. A'e, Iesu Keriso mazao fie'ete'e u'ano, Badi'a'a goitorirote'e ġauġa'e fie'ete'e azaġa zinifine 'ouge reiro.

**23** Keriso mazao fie'ete'e madağā 'izema arogano, Mose goro ġoe'ani'a eme'e ane hegote'ete'e tuğure azaga teige ani 'u'uğano obofe tiro, onao eme'a Keriso mazao fite'e madağā Badi'a'a furenofiro.

**24** E'ano'o Mose goro ġoe'a'e emeğe ibitofi'ete'e ihoreğā vazəğano reiro, onao Keriso'a ariro. A'e, eme'a fiadu Badi'a ubumao duduğā rae rouga veize reiro.

**25** Izidi eme Keriso mazao fie'ete'e madağani'a ariro 'ahine, Mose goro ġoe'a'e mene bare emeğe ibitofi'ete'e ihoreğā vazəğā ra'ohe.

**26** Zae nidu'a fie'ete'e u'ano, Keriso Iesu teite tiburanadu Badi'a ubugaubuga reiro.

**27** Zae nidu'a'e babatiso madu Keriso teite tiburaro ebu dabua iziga hağairote'e teige, za'e Keriso heuğā reiro.

**28** Za'e mene vazə nunu. Iuda vazəğā ga mene Iuda vazəğā, tuğure vazəğā ga mene tuğure vazəğā, ohoze ga roğae'e o'o'a. Za Keriso Iesu teite tiburanadu zae nidu'a'e tiba.

**29** Za Keriso mone reine, za'e Aberahamo mariga ebu Badi'a'a ġoitorirote'e idunağano Moze Badi'a'a zini'ete'e toheğā hidite'e azağā.

## 4

**1** E 'ahi reihi. Moga tohe nidu'a meite'e ubuga'e ġau nidu'a meirote'e vazəğā rehano, kome'a madağano'e ani'e tuğure vazəğā heuğā.

**2** Ani kome'a madağano, ani'e ane taufe'ete'e azağā zu ane ġau taufe'ete'e azağā ġoere egozini'ohe, onamo mogani'a ohonirote'e madağā me'uma.

**3** E'e teige, eme'e kome'a madağano raha 'adi ibitohau'ete'e viga\* nunu hegotadu tuğure azağā teige radiunu.

**4** Rehano Badi'a'a ohonirote'e madağā meirotene, Badi'a'a Ubuga tuğunadu ani'e roğae 'ahoga mazaono'o fureraro ebu Mose goro ġoe'a hegotē'ena'a radiro.

**5** Badi'a'a Ubuga tuğunirotā'a'e Mose goro ġoe'anono'o vaze bohaze buzoga veize, zu eme'e Badi'a ubuga rae rouga veize reiro.

**6** Za'e Badi'a ubuga u'ano, ani'a Ubuga Viga emege zamao tuğuniro, e'ano'o Ubuga Viga u'ano eme'a Badi'a mazao, "Mama,<sup>†</sup> eğe Mama," rae hune'ohe.

**7** E'ano'o zae tibatiba'e tuğure azağano mene bare ra'ohe, rehano Badi'a ubuga rae ra'ohe. Za'e Badi'a ubugaubuga u'ano, Badi'a'a ane ubugaubuga zinite'e toheğā nidu'a zae zuni zini'uma.

### *Paulo'a Galatia Ekalesia Azağā Zamare Borofiro*

**8** Ibite za'e Badi'a ağu'a madağano mene badi'a huga rae ra'ete'e ġauğā hegotadu ane tuğure azağano reiro.

**9** Rehano izidi za'e Badi'a edeğā. Hube hune, e Badi'a'a za ederiyo rae re'uma. Rehano za nougadu raha 'ada ibitohau'ete'e viga nunu bare väge'ohe? A'e inarağā o'o'a zu huga o'o'a. Za'e de'eguğā viga hegotē'ete'e tuğure azağano bare reihi ra'ehe?

---

\* **4:3 4:3** ihoreğā    † **4:6 4:6** Aba

<sup>10</sup> Zae'a Iuda azaḡa haḡai teige, mada boro nunu, bato boro nunu, irugu zu nahune madaḡa nunu ebu muri nunu hegote'ohe.

<sup>11</sup> 'Ougadu, "E zae veize gauinuta'a'e foure re'uma ga?" rae zamahe'a adudu'ohe.

<sup>12</sup> Nego nabudi, e umize'ohe. E'e Iuda azaḡa goro ḡoe'a modadu zae teigiro, e'ano'o zae zuni eጀe teige Iuda azaḡa goro ḡoe'a ago hegoto'i. Za'a eጀe mazao ve'oḡa mene haḡairo.

<sup>13</sup> Za edeḡa, e ugihadu zae vaḡe amiro ebu hari manoḡa zae mazao ḡadahe haramiro.

<sup>14</sup> Za ugihe horonadu zamaze'a adudaro gaogi rehano, e mene ovoe ḡiahiro zu mene hezahohiro. Ebu Badi'a tuḡure viga ga Iesu Keriso teige mae ḡihihiro.

<sup>15</sup> E'e madaḡano zae'a ufeta matu'e rudanadu za'e idaḡa reifone ubumaze ḡude vaginadu eጀe inih i rae reifo.<sup>‡</sup> E'e moneo e'a vaze mazao rae furenoga zuni idaḡa. Rehano izidi zae matu'u a'e nougeha?

<sup>16</sup> Eጀe'a ḡoere huga zeadu e'e zae agire vazegā reirohe?

<sup>17</sup> Guriro ihore azaḡa'e zae'a manoḡa mouga veize za mene zamare'ohe. Ze'e eme mazaono'o zae mae vaḡizadu zae'a ze inare hegotoga da'o urate'ohe.

<sup>18</sup> Iniu'a zae danazifine inarine, a'e manoḡa. Mene eጀe'a zae teite radiu'ete'e madaḡano da'o, rehano mada nidu'a 'ougine, manoḡa.

<sup>19</sup> Eጀe tahi'atahi'a, roḡae'a ene furene'ete'e madaḡano gigi'a ma'ete'e teige, e zae u'ano bare gigi'a ma'ohe, onamo zae'a Keriso teigi'uma.

---

<sup>‡</sup> **4:15** **4:15** Paulo ubuma ugīgeta radu ze ani vetuḡaniro.

**20** E izidi zae teite radadu negane rōgeru āgorezihi ra'ohe, mazaāga e zae moneo 'ada'adahe'ohe.

*Hagara zu Sara Hari Idaidaāga*

**21** Mose goro āgoe'a hegote radihi ra'ete'e azaāga, eho'i! Za Mose goro āgoe'ani'a nagini ra'eta'a'e aāgu'ahe?

**22** Buka Zāgōgano 'ahige rae mirihiro.<sup>†</sup> Aberahamo'e ubuga aheu. 'Ahoga'e tūgure rōgaeāgani'a fureniro, u 'ahoga'e mene tūgure rōgaeāgani'a fureniro.

**23** Tūgure rōgaeāga mazaono'o furerarote'e ubuga'e vaze ahiri ibiāgano fureraro, u mene tūgure rōgaeāga mazaono'o furerarote'e ubuga'e Badi'a'a āgitorirote'e āgoe'anono'o fureraro.

**24** A'e hari idaidaāga ra'ohe. Rōgāe aheu a'e Badi'a'a vaze teite āgitorirote'e āgoe'a aheu. Rōgāe tiba'e Hagara. Hagara'e Badi'a'a Sinai maāgano zinirote'e gorōgā āgoe'a heuāga. E'e goro āgoe'ani'a vaze tutuzadu Hagara ubugaubuga teige, e'e goro āgoe'a hegote'ete'e tūgure azaāgano mae tiro.

**25** Hagara'e Arabia haba'ano Sinai maāga teite idaniro, ebu izidi'e Ierusalema ne boro teite idaniro. Ierusalema'e Ierusalema azaāga teite goro āgoe'a e'e hegote'ete'e tūgure azaāga teige radiu'ohe.

**26** Rehano adure Ierusalemaāga'e mene tūgure rōgaeāga ebu a'e emeēge nanu.

**27** Buka Zāgōgano 'ahige rae mirihiro,  
"Ene mene furene'ete'e gabani rōgaeāga,

---

<sup>†</sup> 4:22 4:22 Ġadaheāga 16:15, 21:2

matu'o'i!

Ene furene'ete'e gigi'aǵa aǵu'a roǵaeǵa,  
agoǵo boro hina, ǵihau ǵoero'i!

Mazaǵa iniu ane da'o radiu'ete'e roǵaeǵa  
ubugaubuga'e ǵehara'uma.

Ze'e i'a teite radiu'ete'e roǵaeǵa ubugaubuga  
ufeta vitize ǵehara'uma."<sup>⊛</sup>

**28** Nego nabudi, za'e Isako teige Badi'a'a  
ǵoitorirote'e ubugaubuga.

**29** Rehano Aberahamo madaǵano vaze ahiri  
ibigano furerarote'e ubugani'a Vine Zaǵogá  
gigi'aono'o furerarote'e ubuga aduga boro haro.  
E'e teige, izidi zuni 'uguǵani'a fureru'ohe.

**30** Rehano Buka Zaǵogáno nouge rae ra'ohe?  
"Tuǵure roǵaeǵa ubugeta hegozo'i, mazaǵa  
tuǵure roǵaeǵa ubuga'e mene tuǵure roǵaeǵa  
ubuga teite moga tohe mene hune hidi'uma."<sup>⊛</sup>

**31** E'ano'o, nego nabudi, eme'e mene tuǵure  
roǵaeǵa ubugaubuga, rehano tuǵure mene  
haǵae'ete'e roǵaeǵa ubugaubuga.

## 5

### *Keriso'a Emeǵe Bohafe Bufiro*

**1** Keriso'a Mose goro ǵoe'anono'o emeǵe bohafe bufirote'e u'ano, eme'e boha'a. E'ano'o za'e edau gigaru'ena'a, Mose goro ǵoe'a hegote'ete'e tuǵure azaǵano aduga ago bare odoho'i.

**2** Eǵe, Paulo'a zi'ohe, za faine ego'i. Za ahiri rana iǵuri haǵae'ete'e mae ǵihinine, Keriso'e zae mazao manoǵa rae mene re'uma.

---

<sup>⊛</sup> 4:27 4:27 Isaia 54:1    <sup>⊛</sup> 4:30 4:30 Įadaheǵa 21:10

<sup>3</sup> Iniu ahiri rana iğuri hağae'ete'e vazeğä mazao eğe'a bare ra'ohe. Ani'e Mose goro ġoe'a nidu'a zuni hegote huni'uma!

<sup>4</sup> Zae bo'ağano Mose goro ġoe'a hegotadu Badi'a ubumao duduğä rae reihi rae ra'ete'e azağä'e Keriso mazaono'o mae rovozirote'e azağä reiro, zu Badi'a'a zeğe mazao furene'ete'e manoğaganono'o uitadu vağiniro.

<sup>5</sup> Eme'e Vine Zaġoġaono'o fiadu Badi'a ubumao duduğä rae rouga mae ġihine'ena'a inare guhine'ohe.

<sup>6</sup> Mazağä Keriso Iesu teite tiburaune, ahiri rana iğuri hağae'eta'a'e ga mene hağae'eta'a'e mene ġau boro. Rehano ġau boro'e vaze zamare borofadu zae'a fie'ete'e furene'ohe.

<sup>7</sup> Zae'a ġoere huga hegote'ena'a faine dure arinu. Rehano iniu'a za ġoere huga hegotoga 'uiro?

<sup>8</sup> Zama au'ete'e hağaiğä 'uguğä'e za huzirote'e Badi'ağa mazaono'o mene ariro.

<sup>9</sup> Vaze'a 'ahige ra'ohe, "Isiti tahiğä fase'a usuga nidu'a'e mae borofe'ohe."

<sup>10</sup> E zae'a iħore nunu mene mae ġihini'uma rae zamare hune'ohe, mazağä eme'e Zuhi'a Boro teite tiburaro. Iniu'a zae zama mae 'ada'adane'ete'e vazegä'e aduga hidi'uma.

<sup>11</sup> Nego nabudi, e'e ahiri rana iğuri hağao'i rae izidi zuni haramifone, nougadu eğe'a 'ize aduga hide'ohe? 'Ouge haramifone, e Keriso satauro moneo harame'ete'e u'ano hide'ete'e adugağani'a eğe mazao mene furerafo.

<sup>12</sup> Zae zama mae 'ada'adane'ete'e azağä'e ze zeğe'a bare ohoze ahiri i'ağä are modoga e

urate'ohe!

<sup>13</sup> Nego nabudi, za'e Mose goro ġoe'anono'o bohaze buzifine Badi'a'a huziro. Rehano Mose goro ġoe'anono'o boha'a radu ahiri urao haġai sau'a ago haġao'i. Rehano nego nabudi zamare borofe'ena'a, danatito'i.

<sup>14</sup> Mose goro ġoe'a nidu'a'e goro ġoe'a tiba 'ahi zamaġano, "Za zae'a bare zamare borofe'ete'e teige nabudize zamare borofo'i." <sup>✳</sup>

<sup>15</sup> Rehano zae'a butu manīga teige vihotitine zu mau 'aune, za zae'a bare ruititi'uma. E'ano'o tohutoho'i!

### *Vine Zaġoġa zu Ahiri Haġaiġa*

<sup>16</sup> Eġe'a zi'ohe, za'e Vine Zaġoġani'a ibitozi'ete'e ibiġano da'o rado'i, 'ougue ahiri ura mene hegote radi'uma.

<sup>17</sup> Ahiri ura'e Vine Zaġoġani'a agirohau'ohe, u Vine Zaġoġa ura'e ahiri'a agirohau'ohe. Anianine'e agirotitadu za zae'a urate'ete'e haġaiġa haġaoga'e mene idaġa.

<sup>18</sup> Rehano Vine Zaġoġani'a zae ibitozine, za'e Mose goro ġoe'a hegote'ena'a, mene radiu'ohe.

<sup>19</sup> Ahiri'a urate'ete'e haġaiġa'e za'e deheru edere'ohe. A'e ubuma ġezo, zama toraga, daro fu'a,

<sup>20</sup> ġuriro badi'aġa mazao kuranoga, naho zu nabone haġaiġa, agirotitoga, ta'irotitoga, ahi-ahi, maġunu fu'a, ane bare da'o zamare borofoga, rovotitoga, zeġezeġe avoavo tiburanoga, zeġezeġe urao da'o haġaoga,

<sup>21</sup> vaze ġau horonadu meihi ra'ete'e zamaroneġa, gagone fu'a, haġai sau'a nunuo da'o

---

<sup>✳</sup> **5:14 5:14** Dibu'o 19:18

matu'e radiu tauğoga zu e'eguğga hağaiğga nunu rae ra'ohe. Ibite e iradugu ǵoe'a riğga ziro rehano, izidi bare zi'ohe. Hağai 'uguga hağae'ete'e azağ'a'e mene Badi'a ubugaubuga radu Badi'a'a ze zuhi'azi'ete'e manoğaga mene hid'i'uma.

<sup>22</sup> Rehano Vine Zağogha mazaono'o 'ahiguğani'a huda'uma. A'e, zamarotite'ete'e, matu'e'ete'e, unihotite'ete'e, zama obone gigane'ete'e, vaze mazao manoğga hağae'ete'e, hağai manoğga hağae'ete'e, zama nidu'a hina hağae'ete'e,

<sup>23</sup> roğeru hağae'ete'e zu zeğe'a bare hağai sau'a hezahohau'ete'e ra'ohe. Hağai 'uguga agirohau'ete'e goroğga ǵoe'a'e o'o'a.

<sup>24</sup> Keriso Iesu mone azağ'a'e hağai sau'a hağaihi rae ra'ete'e zamaroneğga zu ahiri ura hağaihi rae ra'ete'e zamaroneğga madu ahirize teite satauro rana ikokoniro.

<sup>25</sup> Vine Zağoghani'a ǵabone iziga rifiro, e'ano'o eme Vine Zağoghani'a ibitofi'ete'e idunağano radi'uma.

<sup>26</sup> Eme emeğe'a bare nife mene hune mae iti'uma, mene hune mae mağunotiti'uma zu mene hune ahiahititi'uma.

## 6

### Vaze Aduga Odohe Tiburatihi

<sup>1</sup> Nego nabudi, za'e vine Zağoghani'a ibitozi'ete'e azağ'a 'ahine, zae bo'ağano vaze 'ahogani'a hağai sau'a hağae'ete'e horono'idene, zae'a namine'ena'a, ane hağai bare mae duduno'i. Ebu zae zuni hağai sau'a hağaihi rae ra'ete'e zamaroneğano mene uitifine zae'a bare tohutoho'i.

<sup>2</sup> Zae bo'aǵano nagi aduga zuni odohe tiburano'i. 'Ougine, za'e Keriso goro ǵoe'a hube hune hegote haǵai'uma.

<sup>3</sup> Vaze 'ahoga'e niǵa 'o'o'a rehano, ane'a bare niǵa boro rae zamarine, ani ane bare so'one'ete'e heuǵa.

<sup>4</sup> Vaze tibatiba'e haǵaiǵa gianadu haǵai manoǵa 'ahoga horonine, ane'a bare ane niǵunoga'e idaǵa. Rehano vaze 'ahoga haǵai teite'e mene idatiti'uma,

<sup>5</sup> mazaǵa anianine tohe'e aneane'a odohi'uma.

<sup>6</sup> Badi'a ǵoere ihoreǵa igi'ete'e vazegá'e ǵau manoǵa nidu'a ane ihore vazegá teite daini'uma.

<sup>7</sup> Za zae bare ago so'ozo'i. Vaze 'ahogani'a Badi'a ni mae ovoroga'e mene idaǵa, mazaǵa vaze'a nagi ezoga ǵoraune, e'e huga hirivi'uma.

<sup>8</sup> Iniu'a ahiriǵano ǵoraune, ahiriǵanono'o rune\* hirivi'uma, u Vine Zaǵogano ǵoraune, Vine Zaǵogānōno'o ǵabone tuǵutuǵu hirivi'uma.

<sup>9</sup> E'ano'o eme haǵai manoǵa haǵae'ete'e zamáǵano zamafe mene zoreri'uma, mazaǵa e'e haǵaiǵa mene modine, Badi'a'a ohonirote'e madaǵano'e e'e naeǵa hirivi'uma.

<sup>10</sup> E'ano'o eme'a mada manoǵa 'ahoga'ahoga horonine, vaze nidu'a mazao haǵai manoǵa haǵai'uma. Nego nabudi fie tiburu'ete'e mazao'e ufeta haǵae huni'uma.

### *Iradugu Riga Ȑoe'a zu Uhiu Ȑoe'a Ȑonaga*

<sup>11</sup> Įiano'i, eǵe'a 'evorehe hina zae veize 'ahige borofe mirihe'ohe!

---

\* **6:8 6:8** ruhurite'e ǵauǵa

**12** Iniu'e vaze'a niguzoga urate'ete'e azaḡa'e zae'a ahiri rana iğuri haḡaoga te'ote'au'ohe. A'e, Keriso satauro harame'ete'e u'ano hide'ete'e adugaḡa ze mene meifine ra'ohe.

**13** Ahiri rana iğuri haḡairote'e azaḡani'a zuni Mose goro ġoe'a mene hegote'e rehano, ze zae'a ahiri rana iğuri haḡae'ete'e urate'ohe. A'e zae'a zeġe iħore hegħotadu ahiri rana iğuri haḡae'ete'e moneo zeġe'a bare niguzoga veize ra'ohe.

**14** Rehano e ġauni 'ahoga mene hune nigure'ohe, rehano emeġe Zuhi'a Boro Iesu Keriso satauro da'o nigune'ohe. Iesu Keriso satauro u'ano, raha gauḡa nidu'a'e eġe moneo rudaro, ebu eġe zuni raha gauḡa nidu'a moneo rudaro.

**15** Ahiri rana iğuri haḡae'eta'a'e ga mene haḡae'eta'a'e mene ġau boro, rehano Badi'a'a haḡairote'e ġaboneġa iziga rouga'e ġau boro.

**16** Badi'a'a goro 'ahi hegote'ete'e azaḡa nidu'a zu Badi'a mone azaḡa<sup>†</sup> nidu'a zama roġeġa zu vetuġa zini'eno'i.

**17** Izidiono'o onamo zama moneo, vaze 'ahogani'a aduga ago eno'i, mazaġa Iesu u'ano meirote'e bebeġa nu'e ahiriheo 'ada 'ahine, e Iesu tuġure vazęġa rae iħoze'ohe.

**18** Nego nabudi, emeġe Zuhi'a Boro Iesu Keriso'a furene'ete'e manoġaġa'e zae nidu'a vi-neo radiu'eno'i. Amen.

---

<sup>†</sup> **6:16 6:16** Badi'a mone Isaraela azaḡa

**Buka Zaḡoḡa Ġoitore Iziga  
The New Testament in the Uare language of Papua  
New Guinea  
Nupela Testamen long tokples Uare long Niugini**  
copyright © 2017-2024 Wycliffe Bible Translators, Inc.

Language: Uare

Translation by: Wycliffe Bible Translators

Contributor: Global Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2025-08-11

---

PDF generated using Haiola and XeLaTeX on 11 Aug 2025 from source files dated 11 Aug 2025

c398f744-e34b-525a-a9fe-d04e84ab7b13